

Mo ina mudesta tscheina – e bia canzuns

100 onns Chor-baselgia evangelic Sagogn

■ **Vendergis vargau ein commemoras e commembers dil Chor-baselgia evangelic da Sagogn s'entupai ella ustria Stiva Grischna pervia d'in eveniment special: La suprastanza dil chor ha offeriu a commemoras e commembers ina sempla tscheina per commemorar il 100avel anniversari dall'uniun.** Sch'ina uniun festivescha il 100avel anniversari vegn quei fatg per ordinari cun ina fiasta pli gronda. Pil centenari vegnan envidai chors hospitants, ei ha liug ina commemoraziun pli gronda, ina fiasta giubilara cun oraturs, concerts e til festiv. Quei ei silmeins il standard. Tut auter tier in'uniun a Sagogn: En tutta tgeudad ha il chor-baselgia evangelic festiva suu giubileum da 100 onns. Vendergis vargau ha la suprastanza envidau cantaduras e cantadurs activs ad ina tscheina.

Gia ils 1853 existeva in chor

Sco quei ch'igl ei generalmeins enconschent ei Sagogn in vitg paritetic. Quei vul gir che catolics e reformai vivan dapi la Reformaziun – pia dapi gleiti 500 onns – da cuminonza el medem vitg. Enstagl che tut ils habitants da Sagogn ein secunvegna da restar tier la confessiun veglia ni da midar tier la nova han els decidu gia el 16avel tschentaner da viver in sper l'auter senza embrugls. Tals ha ei tuttina dau, cunzun el 17avel tschentaner. Dispettas ed aversiuns confessionalas ein denton dagitg vargadas. En ina casa vivan commembers



La foto muossa il Chor-baselgia reformau da Sagogn avon la baselgia da Gadmen ella Surselva bernesa. Il zercladur d'uonn ha il chor visitau l'anteriura plevonessa Ivana Fucik.

MAD

d'ina confessiun, ella vischina tals dall'otra.

Buc il davos entras il cant eis ei gartegiau da viver en pasch e harmonia. Malgrad quei dat ei aunc oz dus chors-baselgia separai a Sagogn. In dad els, il chor mischedau reformau, festivescha siu 100avel anniversari. Ils 1909 havevan 25 commembers fundau quel. Intent eri stau da dar tempra festiva a fiastas ecclesiasticas. Era la tgira dalla cumpignia cul spért religius e la cultu-

ra reformada haveva animau da semeter ensemen en in chor-baselgia. El senn dalla Reformaziun nua ch'il lungatg dil pievel ha ina gronda muntada existeva denton gia bia pli baul in chor-baselgia. En in cudisch da cant che vegn conservau en ina casa privata eis ei documentau nér sin alv ch'in chor viril reformau existeva gia igl onn 1853. Ord quel ei lu il chor viril resortius sco quei ch'el existia aunc oz. Ils umens havevan mess dalla vart barrieras confessionalas ed en-

tschiet a cantar ensemen senza mirar sila confessiun.

La renaschientscha

Sper il cant profan muncava tuttenina ella pleiv reformada in chor-baselgia. Per quei han 25 commembras e commembers dallas famiglias reformadas Candrian, Coray, Bundi, Padrun, Schmidt, Steinrisser ed Oswald fundau in chor sacral. Quel ei silsuenter staus activs rondund 50 onns. Tochen els onns tschun-

conta eis ei vegniu cantau stedi e regularmeins. Igl ei documentau ch'il Chor-baselgia evangelic da Sagogn ei era separticipaus a fiastas da cant districtualas ed allas fiastas ecclesiasticas regionalas. Da circa 1956 tochen 1976 ha il chor lu fatg in paus. Adina puspei havev'ins fatg in sforz da reactivar el. Quei ch'ei la finala gartegiau pil beinvegna da plevon René Bachofen. Pli tard han 22 commembras e commembers cantau sin iniziativa da siu successur, plevon Donald Hassler. In factur impurtont ch'ins stueva adina puspei interromper las activtads era la munconza da dirigent. Da Pastgas 1990 ha scolast Georg Candrian surpriu la bitgetta e dirigiu il chor duront 13 onns. En quels onns ha il chor dau concerts, ha tgirau il cant sacral e profan, ha cantau regularmeins en baselgia e tgirau la cuminonza. Era viadis nunemblideivels datan perdetga d'ina perioda fetg fritgeivla e vastas activtads.

Igl onn 2004 ha la feglia da scolast Georg, la musicista Daniela Candrian, surpriu la bitgetta. Cun sia dinamica, scolaziun e sensori per la «biala» canzun gartegia ei ad ella da motivar cantaduras e cantadurs. Il diember variescha pauc dapi l'entschatta. Oz fan 19 persunas part dil chor, 12 dunnas e 7 umens. La sera commemorativa pil 100avel anniversari ei stada tipica per quei chor: Igl ei vegniu cantau, ina canzun suenter l'otra, a moda pacifica e senza oraturs ed acts festivs.

Augustin Beeli

TRUN

Sur Tomasz Piotr Drwal daventa plevon

Cun occasiun dalla bein frequentada radunonza dalla Pleiv s. Martin da Trun il venderdis vargau ei la tractanda principala stada l'elecziun da sur Tomasz Piotr Drwal sco plevon. Suenter la prelecziun dil curriculum vitae dil niev plevon da 48 onns ha el relatau sur da sia affonza e las difficultads da studegiar teologia en ina tiara, bein fetg catolica, denton cun in reschim totalitar communist. Per sescriver en l'universitad ha el stuiu s'immatricular en il rom filosofia-teologia e buca semplameins teologia. In fatg ch'ei per nus, che vevin en ina tiara nua che la libertad persunala s'auda da vegl enneu tier ils dretgs fundamentals, bein mo grev da capir. En sia pratica sacerdotala da 23 onns ei el buca mo staus docent sin las universitads da Tarnow e Krakau, el ei era

staus guid da pelegrinadis en las tiaras sontgas. Leu ei el seprofundaus en ils lungatgs originals biblics per aschia buca esser dependents da translaziuns dil Veder Testament e cheutras eis ei ad el pli sempel d'interpretar precisameins la scartiras dil Veder Testament.

Sin fundament dallas experientschas positivs fatgas duront ils davos 15 meins cun sur Tomasz sco carstgaun, scienziau e sacerdot ha la suprastanza dalla pleiv dumandau sur Tomasz sch'el lessi buca schar eleger sco plevon dalla pleiv. Suenter sia risposta positiva e cun consentiment digl episcopat ha la elecziun desiderada saviu succeder.

Sco il plevon ha palesau als presents ha sia decisium giu differents motivs. El

selegra d'astgar accumpignar ils cartents en la veta quotidiana e da saver far quei ella bellezza cuntrada sursilvana, circumdada dallas imposantas cadeinas da cuolms. Motivs persuerter ein era stai la cultura ed il lungatg romontsch. Mo era la curteseivladad ed il fatg ch'el ei vegnius beneventaus dalla populaziun dalla vischnaunza – sco jester – naven dalla bial'entschatta cun in cor aviè e senza pregiudezis, han fatg quella decisium pli sempl. Cun ina tscherna unanima han ils parochians documentau lur simpatia e mussau l'engrazièivladad envièrs la decisium il niev plevon. Nus giavischen ad el vinavon in bien maun e la benedicziun divina per siu operar sacerdotale.

Cussegl pastoral/anr

La pli pintga fier d'advent



■ (anr/hh) Ell'ucivla da Segnas ha giu liug la davosa fin d'jamna probablameins la pli pintga fier d'advent dalla regiun. Quella ei vegnida procurada dallas treis exposituras Regula Manetsch, Ida Dermon e Sina Lehmann (da sen.). Visitadras e visitaders ein buca mo vegni puppergnai cun in sitg, mobein han era saviu prender investa da bellezza lavurs fatgas a maun: Tschupials e decoraziuns per advent e Nadal, cartas, candeilas e cozzas. A quella sentupada da tempra amicabile ha ins denton era saviu cumprar petta cun péra.

FOTO H. HUONDER



La Quotidiana presenta l'annada 2008

Suenter la tiarza ediziun dils pops digl onn 2008 selegra La Quotidiana da presentar el decours dil meins schaner 2010 ils affons naschi il 4. quartal 2008. Nus dein la pusseivladad agl entir intschesch romontsch da separticipar.

Tarmettei pia ina foto actuala da vies affon ch'ei naschius denter igl october e la fin december 2008 cun las suandontas indicaziuns:

- num e prenum digl affon
- data da naschientscha
- liug da domicil
- num e prenum dils geniturs

La foto digitala duei esser sil pli pauc 500 KB. Fotografias da handy ein buca adattadas, fotos sin pupi perencunter bein. Secapescha che lezzas vegnan returnadas.

La quarta ediziun cumpara il schaner 2010. Ella cumpeglia affons ch'ei naschi il quart quartal 2008 (october–december 2008). Las fotografias e las indicaziuns ein dad inoltrar entochen ils 31 da december 2009 alla suandonta adressa:

La Quotidiana
L'annada 2008
Via comerciala 22
7007 Cuera
e-mail: redaktion-lq@suedostschweiz.ch

Ord il ravugl dallas annunzias inoltradas trai la diala da cletg mingta quartal treis victurs. La Quotidiana selegra dils purtrets dils affons romontschs ed engrazia per la collaboraziun.